


Warkstee

„Workshop zu sexueller Vielfalt in Emden geplant.“ De Fackdennst för Gesundheit van de Stadt hett sük schiens recht wat vörnahmen. Daar sall en Warkstee – ja, Workshop steiht daar – open maakt worren för de sexueele un de geschlechterke (waar is de Verschill?) Mennigfoldigheid in uns Stadt. Dat word ok wükelk Tied, dat hebben wi dudderge Oostfresen de hele Jahren missen musst. Mennigfoldigheid! Dat was stuur, dat all' heel allennig un sünner Warkstee to regeleren. Wenn ik ok al staffold bün, will ik nu man hengahn un mi dat ankieken un anhören. Dat Mitarbeiden in so en Warkstee is wiss nix mehr vör so olle Keerls un kunn mi wall neet good bekommen.

Nu seh ik eerst, dat de hele



Menno Ufkes Janssen

Budel al vörbi is. Dat Bladd, waar dat in steiht, is van verleden Jahr un de Warkstee al weer dicht. Butendien hebben se mi ok heel neet meent mit hör Projekt. Lesben, Schwulen, Bisexueelen un so wieder sullen vöran brocht worren. Heel besünner Minsken also. Un ik bün blot en Otto Normalverbruker, as'n froher seggt hett.

Man dat is doch en grote Stapp na vöörn, wenn de Stadt nu Geld insett för Saken, de't vör en paar Jahr noch neet geven dürss un waar een för in't Kittje komen kunn. Un nu kriggt de för sien besünner Anliggen en hele Warkstee anboden! In dat wunnerbare, neeie Hotel. Egentlik bün ik doch neeisgiererg, wat de daar maakt un leert hebben, wat se warkt hebben in de Workshop un wat de Lüü van de Stadt hör noch bibrocht hebben. Alltied hebb ik docht, dat de dat van sülvst wussen, de Lüü mit de bietje anner Dreih bi de Sex. Dat muss doch ok sünner Lehrstünnen gahn?

Man denn muss d'r doch en Workshop her, sogaar up Engelsk! Ik lööv, ik mutt d'r doch hen. Dat fallt nu seker unner Bildung. Sull't dat ok bi de Volkshoogschool geven? In de hör Forum können se en Bült Lüü unnerbrengen.

Bildung sall doch för alle Minsken wesen. Neet blot för Privilegeerden.

Menno Ufkes Janssen